

四庫全書薈要

• 乾隆御覽本

子部

欽定四庫全書薈要

子部

御纂朱子全書卷二十

詳校官員外郎臣潘紹觀

御纂朱子全書卷二十

孟子一

總論

論語之書無非操存涵養之要七篇之書莫非體驗擴

克之端蓋孔子大概使人優游饜飫涵泳諷味孟子
大概是要人探索力討反己自求故伊川曰孔子句
句是自然孟子句句是事實亦此意也如論語所言

居處恭執事敬與人忠出門如見大賓使民如承大
祭非禮勿視聽言動之類皆是存養底意思孟子言
性善存心養性孺子入井之心四端之發若火始然
泉始達之類皆是要體認得這心性下落擴而充之
於此等類語翫味便自可見

楊至之云看孟子見得一箇大意是性之本體仁義之
良心到戰國時君臣上下都一齊埋沒了孟子所以
推明發見之端緒教人去體認擴充曰孟子高他都

未有許多意思今說得一體認字蚤是遲鈍了孟子
孟子大段見得敏見得快他說話恰似箇獅子跳躍
相似且如他說箇惻隱之心便是仁之端羞惡之心
便是義之端只他說在那裏底便是似他說時見得
聖賢大段易做全無許多等級所以程子云孟子才
高學之無可依據

學問之道無他求其放心而已又曰有是四端於我者
知皆擴而充之孟子說得最好人之一心在外者又

要收入來在內者又要推出去孟子一部書皆是此
意

孟子於義利間辨得豪釐不差見一事來便劈做兩片
便分箇是與不是這便是集義處義是一柄刀相似
才見事到面前便與他割制了

孟子之書明白親切無甚可疑者只要日日熟讀須教
他在吾肚中先千百轉便自然純熟某初看時要逐
句去看他便覺得意思淺迫至後來放寬看却有條

理然此書不特是義理精明又且是甚次第文章某
因讀亦知作文之法

論語多門弟子所集故言語時有長長短短不類處孟
子疑自著之書故首尾文字一體無些子瑕疵不是
自下手安得如此好若是門弟子集則其人亦甚高
不可謂軻死不傳

孟子比孔子時說得高然孟子道性善言必稱堯舜又
見孟子說得實

解書難得分曉趙岐孟子拙而不明王弼周易巧而不

明

以上語類八條

近略整頓孟子說見得此老直是把得定但常放教到極險處方與一斡轉斡轉後便見天理人欲直是判然非有命世之才見道極分明不能如此然亦只此便是英氣害事處便是才高無可依據處學者亦不可不知也

答林擇之

閩史記謂孟子之書孟子自作趙岐謂其徒所記今觀

七篇文字筆勢如此決是一手所成非魯論比也然其間有如云孟子道性善言必稱堯舜亦恐是其徒所記孟子必曾略加刪定也此非甚緊切以朋友間或有疑此者嘗以此荅之恐未是也曰或恐是如此

荅董叔重

問孟子集註序說言史記言孟子受業子思之門人註云趙氏註及孔叢子亦皆云孟子親受業於子思銖謂趙岐所註必有所考孔叢子恐是偽書似不必引

此書如何曰孔叢子雖偽書然與趙岐亦未知其孰
先後也姑存亦無害

荅董叔重○以
上文集三條

梁惠王上

孟子見梁惠王

說義利處曰聖賢之言所以要辨別教分明但只要向
義邊一直去更不通思量第二著才說義乃所以為
利固是義有大利存焉若行義時便說道有利則此
心只邪向那邊去固是未有仁而遺其親未有義而

後其君纔於為仁時便說要不遺其親為義時便說要不後其君則是先有心於為利聖賢要人止向一路做去不要做這一邊又思量那一邊仲舒所以分明說不謀其利不計其功

孟子大綱都剖析得分明如說義利等處如荅宋慳處見得事只有箇是非不通去說利害看來惟是孟子說得斬釘截鐵

正淳問仁者心之德愛之理義者心之制事之宜德與

理俱以體言制與宜俱以用言否曰心之德是渾淪
說愛之理方說到親切處心之制却是說義之體程
子所謂處物為義是也揚雄言義以宜之韓愈言行
而宜之之謂義若只以義為宜則義有在外意須如
程子言處物為義則是處物者在心而非外也又云
大概說道理只渾淪說又使人無捉摸處若要說得
親切却又局促有病如伊川說仁者天下之公善之
本也說得渾淪開闊無病知言說理是要親切所以

多病

程子曰處物為義非此一句則後人恐未免有義外之見如義者事之宜事得其宜之謂義皆說得未分曉蓋物之宜雖在外面所以處之使得其宜者則在內

也

以上語類四條

王立於沼上章

德修說王立於沼上一章引齊宣王見孟子於雪宮事云梁惠王其辭遜齊宣王其辭誇先生曰此說好

類語

寡人之於國也章

問梁惠王移民移粟之政周官廩人之職未嘗廢孟子
非之者豈以惠王不知仁政之本耶曰此無異議但
當熟翫孟子所說王政之始終其措置施行之方略

次第耳

○答張敬之文集

晉國天下莫強焉章

問孟子告梁王省刑罰薄稅斂便可以撻秦楚之甲兵
夫魏地迫近於秦無時不受兵割地求城無虛日孟

子之言似大容易否曰自是響應如此當時之人焦熬已甚率歡欣鼓舞之民而征之自是見效速後來公子無忌縞素一舉直擣至函谷關可見

孟子亦是作為底人如云彼陷溺其民王往而征之夫誰與王敵非不用兵也特其用兵不若當時戰國之無義理耳如五畝之宅樹之以桑而下為政之實行之既至則視當時無道之國豈可但已哉

以上語類二條

孟子見梁襄王章

問望之不似人君此語孔子還道否曰孔子不說孟子

忍不住便說

語類

齊宣王問齊桓晉文之事章

無道桓文之事事者營霸之事儒者未嘗講求如桓公
霸諸侯一匡天下則誰不知至於經營霸業之事儒
者未嘗言也

或問仁術字當何訓曰此是齊王見牛穀鯀而不忍之
心萌故以羊易之孟子所謂無傷蓋能護得齊王仁

心發見處術猶方便也

陳希周問仁術曰術字本非不好底事只緣後來把做變詐看了便道是不好却不知天下事有難處處須著有箇巧底道理始得當齊王見牛之時惻隱之心已發乎中又見釁鐘事大似住不得只得以所不見者而易之乃是他既周旋得那事又不抑過了這不忍之心此心乃得流行若當時無箇措置便抑過了這不忍之心遂不得而流行矣此乃所謂術也

見牛未見羊也未字有意味蓋言其體則無限量言其用則無終窮充擴得去有甚盡時

問先生解物皆然心為甚曰人心應物其輕重長短之難齊而不可不度以本然之權度又有甚於物者不知如何是本然之權度曰本然之權度亦只是此心此心本然萬理皆具應物之時須是子細看合如何便是本然之權度也如齊宣王見牛而不忍之心見此是合權度處及至興甲兵危士臣構怨於諸侯又

却忍為之便是不合權度失其本心又問莫只是無所為而發者便是本心曰固是然人又多是忘了問如何忘了曰當惻隱時却不惻隱是也問此莫是養之未至否曰亦是察之未精

黃先之問物皆然心為甚曰物之輕重長短之差易見心之輕重長短之差難見物之差無害心之差有害故曰心為甚又曰物易見心無形度物之輕重長短易度心之輕重長短難度物差了只是一事差心差

了時萬事差所以心為甚又曰以本然之權度度心又曰愛物宜輕仁民宜重此是權度以此去度

問孟子論齊王事考之史記後來無一不效曰雖是如此已是見得遲了須看他一部書見得句句的確有

必然之效方是

以上語類七條

梁惠王下

莊暴見孟子章

孟子開道時君故曰今之樂猶古之樂至於言百姓聞

樂音欣欣然有喜色處則關閉得甚密如好色好貨亦此類也

語類

齊宣王問文王之囿章

孟子言文王由百里興亦未必然問孟子謂文王之囿方七十里先生以為三分天下有其二以後事若只百里如何有七十里之囿然孟子所謂傳有之者如何曰想他須有據但孟子此說其意亦只主在風齊宣王爾若文王之囿果然縱一切人往則雖七十里

之大不過幾時亦為赤地矣又焉得有林木鳥獸之
長茂乎周之盛時雖天下山林猶有厲禁豈有君之
苑囿反縱芻獵恣往而不禁乎亦無是理漢武帝規
上林苑只有二三十里當時諸臣已皆以為言豈有

文王之囿反如是之大

語類

問交鄰國有道章

問仁者為能以大事小是仁者之心寬洪惻怛便是小
國不恭亦撓他不動智者為能以小事大蓋智者見

得利害甚明故祇得事大曰也不特是見得利害明道理自合恁地小之事大弱之事強皆是道理合恁地至問樂天者保天下畏天者保其國曰只是說其規模氣象如此

語類

問梁惠王下第三章尹氏曰仁者之心至公也智者之心用謀也以小事大則狹隘而私一國必大謂二者所遇不同而應之皆出於理之所當然其規模固有廣狹然其智者私於一國則非畏天之旨矣仁智之

辨當別有說曰仁者自然合理智者知理之當然而
敬以循之其大概是如此若細分之則太王勾踐意
思自不同也

答吳伯豐

問樂天畏天不同以仁者而居小國固不免為智者之
事使智者而居大國則未必能為仁者之舉何者智
者分別曲直未必能容忍而不與之較如仁者之為

也曰得之

答潘謙之○以上文集二條

問人皆謂我毀明堂章

劉孟子以公劉大王之事告其君恐亦是委曲誘掖之意曰這兩事却不是告以好色好貨乃是告以公劉大王之事如此兩事看來却似易待去做時多少難大凡文字須將心體認看這箇子細看來甚是難如孟子又說子服堯之服誦堯之言行堯之行是堯而已矣看來也似易這如何便得相似又如說徐行後長者謂之弟疾行先長者謂之不弟堯舜之道孝弟而已矣看來也似易

問孟子語好貨好色事使孔子肯如此答否曰孔子不如此答但不知作如何答問孟子答梁王問利直掃除之此處却又如此引導之曰此處亦自分義利特人不察耳

以上語類二條

所謂故國章

左右固非大臣亦非閹宦弄臣但謂親近之臣如漢侍中給事中魏晉以來中書門下之比云耳所謂左右太親者身蔽正指劉放孫資而言耳大夫却是任政

之臣六卿官之長亦上大夫也。孟子之意但欲齊王
審於擇人未必以其信左右之言而發所云教之以
不信大臣亦是推說之過大抵讀書只合平心說理
不必如此過求却失正意也。○音潘文叔

問湯放桀章

先生舉賊仁者謂之賊賊義者謂之殘問何以別道思
云賊仁是害心之理賊義是見於所行處傷其理曰
以義為見於所行便是告子義外矣義在內不在外

義所以度事亦是心度之然此果何以別蓋賊之罪
重殘之罪輕仁義皆是心仁是天理根本處賊仁則
大倫大法虧滅了便是殺人底人一般義是就一節
一事上言一事上不合宜便是傷義似手足上損傷
一般所傷者小尚可以補

語類

為巨室章

問教玉人彫琢玉集註云不敢自治而付之能者愛之
甚也治國家則不能用賢而徇私欲是愛國家不如

玉也此莫是餘意否曰正意是如何曰正意只是說
玉人自會琢玉何消教他賢者自有所學何用教他
舍其所學後譬言只是申解前譬言曰兩譬言又似不相似
不知如何做得恁地嵯峨

語類

齊人伐燕勝之章

齊人伐燕孟子以為齊宣史記以為湣王溫公平生不
喜孟子及作通鑑却不取史記而獨取孟子皆不可
曉荀子亦云湣王伐燕然則非宣王明矣問孟子必

不誤曰想得湣王後來做得不好門人為孟子諱故改為宣王爾問湣王若此之暴豈能慚於孟子曰既做得不是說得他底是他亦豈不愧也

居之間取之而燕民悅則取之至文王是也竊疑文王豈有革商之念曰此等難說孔子謂可與立未可與權到那時事勢自是要住不得以詩書考之如云至於太王實始翦商如下武之詩文王有聲之詩都說文王做事且如伐崇一事又不是一項小小侵掠乃

是大征伐詢爾仇方同爾兄弟以爾鈞援與爾臨衝
以伐崇墉此見大段動衆這般處要做文王無意取
天下都不得或曰紂命文王得專征伐紂不得已命
之文王不得已受之橫渠云不以聲色為政不以革
命有中國默順帝則而天下歸焉其惟文王乎若如
此說恰似內無純臣之義外亦不屬於商這也未必
如此只是事勢自是不可已只當商之季七顛八倒
上下崩頽忽於岐山下突出許多人也是誰當得文

王之事惟孟子識之故七篇之中所以告列國之君
莫非勉之以王道

以上語類二條

滕文公問滕小國也章

問孟子答滕文公三段皆是無可奈何只得勉之為善
之辭想見滕國至弱都主張不起故如此曰只是如
此只是吾得正而斃焉之意蓋滕是必亡無可疑矣
況王政不是一日行得底事他又界在齊楚之間二
國視之猶太山之壓雞卵耳若教他粗成次第此二

國亦必不見容也當時湯與文王之興皆在空閒之地無人來覷他故日漸盛大若滕則實是難保也立之云若教他能舉國以聽孟子如何曰他若能用得孟子至二三十年使鄰國之民仰之若父母則大國亦想不能動他但世間事直是難得恰好耳齊梁之國甚強可以有為而孟子與其君言恬然不恤滕文公却有善意又以國小主張不起以此知機會真不易得也

語類

公孫丑上

問夫子當路於齊章

以齊王猶反手不知置周王於何地曰此難言可以意
會如湯武之事是也春秋定哀間周室猶得至孟子

時天命人心已離矣

語類

李公常語曰孔子曰桓公九合諸侯不以兵車管仲之
力也如其仁如其仁又曰管仲相桓公霸諸侯一匡
天下民到於今受其賜微管仲吾其被髮左衽矣而

孟子謂以齊王猶反手也功烈如彼其卑故曰管仲
曾西之所不為嗚呼是猶見人之鬪者而笑曰胡不
因而殺之貨可得也雖然他人之鬪者耳桓公管仲
之於周救父祖也而孟子非之奈何隱之辯曰孔子
謂管仲如其仁言仲之似仁而非仁也又謂微管仲
吾其被髮左衽言仲有攘卻夷狄之功也至謂其小
器奢僭不知禮言仲之不能圖大致遠也夫奢僭不
知禮之人豈得為仁乎其所以九合諸侯者假仁而

行以濟其不仁耳宜曾西之所不為也昔成湯以七
十里為小國之諸侯伊尹相之以王於天下齊以千
里之國而相管仲管仲得君之專行國政之久功烈
如彼其卑童子且羞稱之况大賢乎有好功利者必
喜管仲仁者不為也管仲急於圖霸藉周室以為之
資耳謂桓公管仲之於周如救父祖吾弗信之矣曰
夫子之於管仲大其功而小其器邵康節亦謂五霸
者功之首罪之魁也知此者可與論桓公管仲之事

矣夫子言如其仁者以當時王者不作中國哀夷狄
橫諸侯之功未有如管仲者故許其有仁者之功亦
彼善於此而已至於語學者立心致道之際則其規
模宏遠自有定論豈曰若管仲而休耶曾西之恥而
不為蓋亦有說矣李氏又有救鬪之說愚以為桓公
管仲救父祖之鬪而私其財以為子舍之藏者也故
周雖小振而齊亦寔強矣夫豈誠心惻怛而救之哉
孟子不與管仲或以是耳隱之以為小其不能相桓

公以王於天下恐不然齊桓之時周德雖衰天命未
改革命之事未可為也孟子言以齊王猶反手自謂
當年事勢且言已志非為管仲發也

讀余隱之尊
孟辯○文集

問夫子加齊之卿相章

或問雖由此霸王不異矣如何分句曰只是雖由此霸
王不異矣言從此為霸為王不是差異

公孫丑問孟子動心否乎非謂以卿相富貴動其心謂
霸王事大恐孟子擔當不過有所疑懼而動其心也

德修問公孫丑說不動心是以富貴而動其心先生曰
公孫丑雖不知孟子必不謂以富貴動其心但謂霸
王事大恐孟子了這事不得便謂孟子動心不知霸
王當甚閒事因論知言養氣德脩謂養氣為急知言
為緩曰孟子須先說我知言然後說我善養吾浩然
之氣公孫丑先問浩然之氣次問知言者因上面說
氣來故接續如此問不知言如何養得氣德脩云先
須養有尺便量見天下長短曰須要識這尺

先生問周看公孫丑不動心章答云云先生曰公孫丑

初間謂任此重事還動心不動心孟子答以不動心
極容易底事我從四十已不動了告子已先我不動
心公孫丑又問不動心有道理無道理孟子又告以
有於是又舉北宮黜孟施舍之勇也是不動然彼之
所以不動者皆強制於外不是存養之功故又舉曾
子之言云自反縮與不縮所以不動只在方寸之間
若仰不愧俯不忤看如何大利害皆不足以易之若

有一毫不直則此心便索然公孫丑又問孟子所以
不動者如何孟子遂答以我知言我善養吾浩然之
氣若依序問當先問知言公孫丑只承孟子之言便
且問浩然之氣

問告子之不動心是否曰告子之不動心是粗法或強

制不動不可知或臨大事而金錄不能不動亦未可知

非若孟子酬酢萬變而不動也又問正如北宮黝之

勇

一作養勇

否曰然

孟施舍北宮黝是不畏死而不動心告子是不認義理而不動心告子惟恐動著他心

問孟施舍量敵慮勝似有懼也孟子乃曰能無懼如何曰此孟施舍譏他人之言舍自云我則能無懼而已問那是孟施舍守約處曰孟施舍本與北宮黝皆只是勇夫比曾子不同如北宮黝孟施舍孟賁只是就勇上言如子襄曾子告子就義理上言

今人把守氣不如守約做題目此不成題目氣是實物

約是半虛半實字對不得守約只是所守之約言北
宮黜之守氣不似孟施舍守氣之約孟施舍之守氣
又不如曾子所守之約也孟施舍就氣上做工夫曾
子就理上做工夫

孟子說曾子謂子襄一段已自盡了只為公孫丑問得
無了期故有後面許多說話

以上語
類九條

縮直也儀禮禮記多有此字每與衡字作對下文直養
之說蓋本於此乃一章大指所繫不可失也

答徐彥
壺○文

不得於言勿求於心不得於心勿求於氣此告子不動
心之法告子只就心上理會堅持其心言與氣皆不
理會不得謂失也有失於其言則曰無害於心但心
不動言雖失不必問也惟失之於心則就心上整理
不復更求於氣

不得於言只是不曉這說話言只似道理字

不得於言勿求於心此正孟子告子不動心之差別處

當看上文云敢問夫子之不動心與告子之不動心
孟子却如此答便見得告子只是硬做去更不問言
之是非便錯說了也不省如與孟子論性說性猶杞
柳也既而轉性猶湍水也他只不問是非信口說出
定要硬把得心定不得於言謂言之失也勿求於心
謂言之失非干心事也此其學所以與孟子異故孟
子章末云我故曰告子未嘗知義以其外之也

不得於言勿求於心不得於心勿求於氣不得猶曰失

也謂言有所不知者則不可求之於心心有不得其
正者則不可求之於氣孟子謂言有所不能知正以
心有所不明故不得於言勿求於心不可其不得於
心者固當求之心然氣不得所養亦反能動其心故
不得於心勿求於氣雖可而未盡也蓋知言只是知
理告子既不務知言亦不務養氣但只硬把定中間
箇心要他不動孟子則是能知言又能養氣自然心
不動蓋知言本也養氣助也三者恰如行軍知言則

其先鋒知虛識實者心恰如主帥氣則卒徒也孟子

則前有引導後有推助自然無恐懼紛擾而有以自

勝告子則前後無引助只恁孤立硬做去所以與孟

子不動心異也不得於言以下但作如此看則此一

章血脈貫通而於知言養氣詖淫邪遁之辭方為有

下落也至於集義工夫乃在知言之後不能知言則

亦不能集義

言如觀古聖賢之言
與聽今人之言皆是

不得於心勿求於氣者不失其本則猶可也不得於言

而不求於心以考其所失則其中頑然無所知識無以擇其義之所安故斷之以不可

問告子謂不得於言勿求於心是自己之言耶是他人之言耶若要得後面知言處相貫則是他人之言曰這一段前後都相貫即是一樣言語告子於此不達則不復反求其理於心嘗見陸子靜說這一段大段稱告子所見高告子固是高亦是陸子之學與告子相似故主張他然陸氏之學更鶻突似告子至云陸

氏之學不甚教人讀書看文字與告子相似否先生
曰便是先生又謂養氣一段緊要處是自反而縮以
直養而無害是集義所生者緊要處在此三句上看

以上語
類六條

不得於心勿求於氣可不得於言勿求於心不可孟子
既引告子之言而論其得失如此夫心之不正未必
皆氣使之故勿求於氣未為盡失至言之不當未有
不出於心者而曰勿求於心則有所不可矣伊川先

生曰人必有仁義之心然後有仁義之氣睟然達於外所以不得於心勿求於氣可也又曰告子不得於言勿求於心蓋不知義在內也皆此意也然以下文觀之氣亦能反動其心則勿求於氣之說未為盡善但心動氣之時多氣動心之時少故孟子取其彼善於此而已凡曰可者皆僅可而未盡之詞也至於言則雖發乎口而實出於心內有蔽陷離窮之病則外有詖淫邪遁之失不得於言而每求諸心則其察理

日益精矣孟子所以知言養氣以為不動心之本者
用此道也而告子反之是徒見言之發於外而不知
其出於中亦義外之意也其害理深矣故孟子斷然
以為不可於此可見告子之不動心所以異於孟子
而亦豈能終不動者哉

○答張敬夫
文集

問血氣之氣與浩然之氣不同曰氣便只是這箇氣所
謂體之充也便是

問志至焉氣次焉曰志最緊氣亦不可緩志至焉則氣

便在這裏是氣亦至了

志至氣次只是先後志在此氣亦隨之公孫丑疑只就
志理會理會得志氣自隨之不必更問氣也故云又
曰持其志無暴其氣何也孟子下文專說氣云蹶趨
之氣亦能動心

先生問公每讀無暴其氣如何鄭云只是喜怒哀樂之
時持之不使暴戾曰此乃是持其志志者心之所向
持志却是養心也不是持志之外別有箇養心持者

把捉教定當喜時也須喜當怒時也須怒當哀時也
須哀當樂時也須樂審教定後發必中節這是持志
若無暴其氣又是下面一截事若不當喜而喜與喜
之過分不當怒而怒與怒之過分不當哀樂而哀樂
與哀樂之過其節者皆是暴其氣暴其氣者乃大段
粗也

心之不定只是合下無工夫曰所以不曾下得工夫病
痛在何處曰須是有所養曰所謂養者以直養否曰

未到以直養處且持其志無暴其氣可也若我不放
縱此氣自然心定

遺書曰志一動則動氣氣一動則動志外書曰志專一
則動氣氣專一則動志二者孰是曰此必一日之語
學者同聽之而所記各有淺深類多如此志一動則
動氣氣一動則動志此言未說動氣動志而先言志
動氣動又添入一動字不若後說所記得其本旨蓋
曰志專一則固可以動氣而氣專一亦可以動其志

也
以上語
類六條

程子有言志壹氣壹專一之意若志專在淫僻豈不動

氣氣專在喜怒豈不動志當只依此說

荅林擇之
文集

蹶者趨者是氣也而反動其心今人奔走而來偶喫一
跌其氣必逆而心不定是氣之能動其心如人於忙
急之中理會甚事亦是氣未定也

敢問夫子惡乎長曰我知言我善養吾浩然之氣公孫
丑既知告子之失而未知孟子之所以得敢問焉而

孟子告之我知言者能識羣言之是非也浩然盛大
流行之貌蓋天地之氣而吾之所得以充其體者也
孟子能知人言之是非告子乃自以其言為外而不
復考其得失孟子善養其氣而告子乃以為末而不
求其得失可見矣

胡氏云格物則能知言誠意則能養氣

孟子說養氣先說知言先知得許多說話是非邪正都
無疑後方能養此氣也

問知言在養氣之先如何曰知是知得此理告子便不理會故以義為外如云不得於言勿求於心雖言亦謂是在外事更不管著只強制其心問向看此段以告子不得於言是偶然失言非謂他人言也曰某向來亦如此說然與知言之義不同此是告子聞他人之言不得其義理又如讀古人之書有不得其言之義皆以為無害事但心不動足矣不知言便不知義所以外義也如詖淫邪遁亦只是他人言故曰生於

其心其字便是謂他人也又言聖門以言語次於德行言語亦大難若非燭理洞徹曾次坦然即酬酢應對蹉失多矣

浩然之氣清明不足以言之才說浩然便有箇廣大剛果意思如長江大河浩浩而來也富貴貧賤威武不能移屈之類皆低不可以語此公孫丑本意只是設問孟子能擔當得此樣大事否故孟子所答只說許多剛勇故說出浩然之氣只就問答本文看之便見

得子細

文振說浩然之氣曰不須多言這只是箇有氣魄無氣魄而已人若有氣魄方做得事成於世間禍福得喪利害方敵得去不被他恐動若無氣魄便做人衰頹懼怯於世間禍福利害易得恐動只是如此他本只是荅公孫丑不動心纏來纏去說出許多養氣知言集義其實只是箇不動心人若能不動心何事不可為然其所謂不動心不在他求只在自家知言集義

則此氣自然發生於中不是只行一兩事合義便謂
可以養襲於外而得之也孔子曰不得中行而與之
必也狂狷乎看來這道理須是剛硬立得脚住方能
有所成

問浩然之氣即是人所受於天地之正氣否曰然又問
與血氣如何曰只是一氣義理附於其中則為浩然
之氣若不由義而發則只是血氣然人所稟氣亦自
不同有稟得盛者則為人強壯隨分亦有立作使之

做事亦隨分做得出若稟得弱者則委靡巽懦都不
解有所立作唯是養成浩然之氣則却與天為一更
無限量

孟子養氣一章大綱是說箇仰不愧於天俯不忤於人
上面從北宮黝孟施舍說將來只是箇不怕但二子
不怕得粗孟子不怕得細或問合而有助助字之訓
如何曰道義是虛底物本自孤單得這氣帖起來便
自張王無所不達如今人非不為善亦有合於道義

者若無此氣便只是一箇衰底人李先生曰配是襯貼起來又曰若說道襯貼却是兩物氣與道義只是一滾發出來思之一滾發出來說得道理好襯貼字說配字極親切

問他書不說養氣只孟子言之何故曰這源流便在那心廣體胖內省不疚夫何憂何懼處來大抵只是這一箇氣又不是別將箇甚底去養他但集義便是義氣知言便是知得這義人能仰不愧俯不忤時看這

氣自是浩然塞乎天地之間

問浩然之氣如何看曰仁義禮智充溢於中粹然見面
盎背心廣體胖便自有一般浩然氣象曰此說甚細
膩然非孟子本意此段須從頭看來方見得孟子本
意孟子當初如何便當大任而不動心如何便過孟
賁遠矣如何便自反而縮千萬人吾往矣只此勇為
不懼便是有浩然之氣此說似粗而實精以程子說
細考之當初不是說不及此只門人記錄緊要處脫

一兩字便和全意失了浩然之氣只是這血氣之氣

不可分作兩氣人之言語動作所以充滿於一身之

中者即是此氣只集義積累到充盛處仰不愧俯不

怍這氣便能浩然問配義之配何謂合而有助之意

曰此語已精如有正將又立箇副將以配他乃所以

助他天下莫強於理義當然是義總名是道以道義

為主有此浩然之氣去助他方勇敢果決以進如這

一事合當恁地做是義也自家勇敢果決去做便是

有這浩然之氣去助他有人分明知得合當恁地做
又恧縮不敢去做便是餒了無此浩然之氣如君有
過臣諫之是義也有到冒死而不顧者便是浩然之
氣去助此義如合說此話却恧縮不對便是氣餒便
是欲然之氣只是一氣餒了便成欲然之氣不調和
便成忿厲之氣所以古人車則有和鸞行則有佩玉
貴於養其氣問氣一則動志這氣字是厲氣否曰亦
不必把作厲氣但動志則已是不好底氣了志動氣

者十九氣動志者十一須是以志為主無暴其氣孟
子當初乃剩說此一句所以公孫丑復辯問集義到
成此浩然之氣則氣與義為一矣及配助義道則又
恐成二物否曰氣與義自是二物只集義到充盛處
則能強壯此氣便自浩然所以又反來助這道義無
是氣便餒而不充了問配者助也是氣助道義而行
又曰集義所生是氣又因義集而後生莫是氣與道
義兩相為用否曰是兩相助底意初下工夫時便自

集義然後生那浩然之氣及氣已養成又却助道義而行

古註及程氏皆將至大至剛以直做一句據某所見欲將至大至剛為一句以直養而無害為一句今人說養氣皆謂在必有事焉而勿正心勿忘勿助長四句上要緊未必在此藥頭只在那以直養而無害及集義上這四句却是箇炮炙煅煉之法直只是無私曲集義只是事事皆直仰不愧於天俯不忤於人便是

浩然之氣而今只將自家心體驗到那無私曲處自

然有此氣象文蔚云所以上蔡說於心得其正時識

取曰是文蔚問塞天地莫只是一箇無虧欠否曰他

本自無虧欠只為人有私曲便欠却他底且如萬物

皆備於我反身而誠樂莫大焉亦只是箇無虧欠君

仁臣忠父慈子孝自家欠却他底便不快活反身而

誠樂莫大焉無欠闕也以此見浩然之氣只是一箇

仰不愧於天俯不忤於人王德脩云伊川却將至大

句以直養而無害作一句者為得孟子之意蓋聖賢立言首尾必相應如云自反而縮便有直養意思集義之說亦然端伯所記明道語未必不親切但恐伊川又自主張得別故有此議論今欲只從明道之說也

問塞乎天地之間曰天地之氣無所不到無處不透是他氣剛雖金石也透過人便是稟得這箇氣無欠闕所以程子曰天人一也更不分別浩然之氣乃吾氣

也養而無害則塞乎天地一為私意所蔽則慊然而
餒却甚小也又曰浩然之氣只是氣大敢做而今一
樣人畏避退縮事事不敢做只是氣小有一樣人未
必識道理然事事敢做是他氣大如項羽力拔山兮
氣蓋世便是這樣氣人須是有蓋世之氣方得又曰
如古人臨之以死生禍福而不變敢去罵賊敢去徇
國是他養得這氣大了不怕他又也是他識道理故

能如此

以上語類
十四條

至大至剛只合四字為句以直養而無害此直字便是

上文縮字下文義字孟子之意只是說每事做得是

當即自然無所愧怍意象雄豪所以雖當大任而無

所畏懼耳推其本原因未有不立敬而能集義者然

此章之意則未及夫敬字也此自程子門庭工夫因

此說出來耳

答呂子約

問伊川云養志莫如敬以直內此是就未發上說孟子

所謂自反而縮以直養而無害集義所生皆指事而

言就已發上說孟子方辯告子故專救其偏曰孟子
論養氣只合就已發處說程子說養志自是當就未
發處說各自一義自不妨内外之交養不可說孟子
為救告子義外之失而姑為此言也

答潘謙之○以上文集二條

配義與道配從而合之也氣須是隨那道義如云地配
天地須在天後隨而合之婦配夫亦然畢竟道義是
本道義是形而上者氣是形而下者若道義別而言
則道是體義是用體是舉他體統而言義是就此一

事所處而言如父當慈子當孝君當仁臣當敬此義也所以慈孝所以仁敬則道也故孟子後面只說集義

問氣之所配者廣矣何故只說義與道曰道是體義是用程子曰在物為理處物為義道則是物我公共自然之理義則吾心之能斷制者所用以處此理者也配義與道如云人能弘道

其為氣也配義與道無是餒也配合也義者人心節制

之用道者人事當然之理餒不飽也氣由道義而有
而道義復乘氣以行無異體也得其所養則氣與道
義初不相離而道義之行得以沛然無所疑憚者若
其無此則如食之不飽雖欲勉於道義而亦無以行
矣氣者道義之成質故必集義乃能生之集義猶言
積善

問浩然之氣集義是用工夫處否曰須是先知言知言
則義精而理明所以能養浩然之氣知言正是格物

致知苟不知言則不能辨天下許多淫邪詖遁將以
為仁不知其非仁將以為義不知其非義則將何以
集義而生此浩然之氣氣只是充乎體之氣元與天
地相流通只是仰不愧俯不忤自然無恐無懼塞乎
天地今人心中才有歎愧則此氣自然消餒做事更
無勇銳配義與道者配是相合而有助譬與人鬪敵
又得一人在後相助自然愈覺氣勝告子不得於言
勿求於心不得於心勿求於氣只是一味勃然不顧

義理如此養氣則應事接物皆去不得孟子是活底
不動心告子是死底不動心

是集義所生是氣是積集許多義理而生非是將義去
外面襲取掩撲此氣來粗說只是中有主見得道理
分明直前不畏爾孟施舍北宮黜便粗糙曾子便細
臧爾

或問集義曰事事都要合道理才有此子不合道理心
下便不足才事事合道理便仰不愧俯不忤因云如

此一章初看道如何得許多頭緒恁地多後來看得
無此子室礙

問集義是以義為內義襲是以義為外否曰不必如此
說此兩句是掉轉說如云我固有之也非由外鑠我
也蓋義本於心不自外至積集此義而生此氣則此
氣實生於中如北宮黜孟施舍之勇亦自心生又問
集註云非由只行一事偶合於義便可以掩襲於外
而得之曰集義是集衆義故與只行一事相對說襲

猶兵家掩襲之襲出其不意如劫寨相似非順理而
行有積集工夫者也

集義謂如十事有一事不合義則便有愧須是集聚衆
義然後是氣乃生非義襲而取之非是於外求得是
義而搏出此氣也

自非生知須是一一見得合義而行若是本初清明自
然行之無非是義此舜由仁義行者其他須用學知
凡事有義有不義便於義行之今日行一義明日行

一義積累既久行之事事合義然後浩然之氣自然而生

非義襲而取之見江西人只愛說義襲不知如何襲只是說非以義掩取是氣蓋氣自內而生非由外而入問集註云告子外義蓋外之而不求非欲求之於外也

曰告子直是將義屏除去只就心上理會

以上語類十二條

所論義襲猶未離乎舊見大抵既為聖賢之學須讀聖賢之書既讀聖賢之書須看得他所說本文上下意

義字字融釋無窒礙處方是會得聖賢立言指趣識得如今為學工夫固非可以懸空白撰而得之也如孟子答公孫丑問氣一節專以浩然之氣為主其曰是集義所生者言此氣是積累行義之功而自生於內也其曰非義襲而取之也言此氣非是所行之義潛往掩襲而取之於外也其曰行有不慊於心則餒矣者言心有不慊即是不合於義而此氣不生也是豈可得而掩取哉告子乃不知此而以義為外則其

不動心也直強制之而頑然不動耳非有此氣而自然不動也故又曰我故曰告子未嘗知義以其外之也然告子之病蓋不知心之慊處即是義之所安其不慊處即是不合於義故直以義為外而不求今人因孟子之言却有見得此意而識義之在內者然又不知心之慊與不慊亦有不待講學省察而後能察其精微者故於學聚問辨之所得皆指為外而以為非義之所在遂一切棄置而不為此與告子之言雖若

小異然其實則百步五十步之間耳以此相笑是同浴而譏裸裎也由其所見之偏如此故於義理之精微氣質之偏蔽皆所不察而其發之暴悍狂率無所不至其所慨然自任以為義之所在者或未必不出

於人欲之私也

答項平父

孟子之意須從上文看其為氣也配義與道無是餒也是集義所生者非義襲而取之也此上三句本是說氣下兩句是字與非字為對襲字與生字為對其意

蓋曰此氣乃集義而自生於中非行義而襲取之於外云爾非謂義不是外襲也今人讀書不子細將聖賢言語都錯看了又復將此草本立一切法橫說豎說狂嘖衆生恐其罪不止如范甯之議王弼而已也

荅項

父平

閩中人李復字履中及識橫渠先生紹聖間為西邊使者博記能文今信州有瀉水集者即其文也其間有論孟子養氣者動必由理故仰不愧於天俯不忤於

地無憂無懼其氣豈不充乎故曰是集義所生者舍

是則明有人非幽有鬼責自歎於中氣為之喪矣故
曰無是餒也此語雖踈然却得其大旨近世諸儒之
論多以過高而失之甚者流於老莊而不知不若此
說之為得也惜其亂於詩文博雜之中學者或不之

讀故表而出之

偶讀謾記○以
上文集三條

必有事焉而勿正趙氏以希望之意解正字看來正是
如此但說得不甚分明今以為期待之意則文理不

重複蓋必有事於此然後心不忘於此正之不已然後有助長之患言意先後各有重輕

問必有事焉而勿正之義曰正猶等待之意趙岐解云不可望其福雖說意粗了其文義却不錯此正如師出不正反戰不正勝之正古人用字之意如此言但當從事於此而勿便等待其效之意或問此便是助長否曰正未是助長待其效而不得則漸漸助之長矣譬之栽木初栽即是望其長望之之久而不如意

則揠苗矣明道曰下言之漸重此言却是後因論仁者先難而後獲洽曰先解勿正字頗有後獲之意曰頗有此意曰如此解則於用功處儘有條理曰聖賢之言條理精密往往如此但看得不切錯認了他文義則并與其意而失之耳

勿忘勿助長本連上文集義而言故勿忘謂勿忘集義也一言一動之間皆要合義故勿忘助長謂不待其充而強作之使充也如今人未能無懼却強作之道

我不懼未能無惑却強作之道我不惑是助長也有

事有事於集義也勿正謂勿預等待他聽其自充也

養氣一章在不動心不動心在勇勇在氣氣在集義勿

忘勿助長又是那集義底節度若告子則更不理會

言之得失事之是非氣之有平不平只是硬制壓那

心便不動恰如說打硬修行一般

以上語類四條

問必有事焉而勿正二程多主於敬一說須當集義是

承上文是集義所生者而言所謂必有事則積集衆

善工夫否曰孟子上下文無敬字只有義字程子是
移將去敬字上說非孟子本意也集注亦可細翫

林荅

德久○

文集

某舊說孟子先說知言而公孫丑先問養氣者承上文
方論志氣而言也今看來他問得却是有意意思蓋知
言是那後面合尖末梢頭處合當留在後面問如大
學所論自修身正心却說到致知格物蓋致知格物
是末梢尖處須用自上說下來方得有序也又曰公

孫丑善問問得愈密盛水不漏若論他會恁地問則不當云軻之死不得其傳不知後來怎生不可曉或是孟子自作此書潤飾過不可知

問詖淫邪遁曰詖只是偏詖如人足跛相似斷行不得且楊墨說為我兼愛豈有人在天地間孑然自立都不涉著外人得又豈有視人如親一例兼愛得此二者皆偏而不正斷行不得便是蔽於此了至淫辭則是說得愈汎濫陷溺於中只知有此而不知有他也

邪辭則是陷溺愈深便一向離了正道遁辭則是說得窮後其理既屈自知去不得便別換一箇話頭如夷之說施由親始之類這一句本非他本意只臨時撰出來也先生又云生於其心害於其政者是才有此心便大綱已壞了至發於其政害於其事則是小底節目都以次第而壞矣因云孟子是甚麼的資質甚麼的力量却纖悉委曲都去理會直是要這道理無些子虧欠

詖淫邪遁蔽陷離窮四者相因心有所蔽只見一邊不
見一邊如楊氏為我墨氏兼愛各只見一邊故其辭
詖而不平蔽則陷溺深入之義也故其辭放蕩而過
陷則離離是開去愈遠也故其辭邪離則窮窮是說
不去也故其辭遁遁如夷之之言是也

或問詖淫邪遁四者相因之說曰詖字是遮了一邊只
見一邊如跛字亦是一邊高一邊低跛字亦是脚一
邊長一邊短皆是只有一邊之意淫辭知其所陷淫

便是就所說處多了被他只看得這一邊都蓋了那一邊如人擲在水裏只見得那水更不見有平正底道理說是少了那一邊淫是添了這一邊然說與淫只是見偏了猶自是道理在然只管淫而不止便失了那道理既是不正無緣立得住便至於遁遁則多討物理前來遮蓋

問程子說孟子知言譬如人在堂上方能辨堂下人曲直所謂在堂上者莫只是喻心通於道者否曰此只

是言見識高似他方能辨他是非得失若見識與他一般如何解辨得他

問孟子知言處生於其心害於其政先政而後事闕楊墨處說作於其心害於其事先事而後政曰先事而後政是自微而至著先政而後事是自大綱而至節

目

以上語類六條

孟子之學蓋以窮理集義為始不動心為效蓋唯窮理為能知言唯集義為能養其浩然之氣理明而無所

疑氣充而無所懼故能當大任而不動心考於本章

次第可見矣

與郭
沖晦

問善為說辭則於德行或有所未至善言德行則所言

皆其自己分上事也曰此說得之

答程允夫○以
上文集二條

問顏子具體而微微是微小或隱微之微曰微只是小
然文意不在小字上只是說體全與不全

問浩然之氣後面說伯夷伊尹孔子是則同處曰後面
自是散說出去不須更回引前頭這裏地位極高浩

然之氣又不足言不須更說氣了有百里之地則足以有天下然行一不義殺一不辜則有所不為此是甚麼樣氣象大段是極至處了雖使可以得天下然定不肯將一毫之私來壞了這全體古之聖人其大根脚同處皆在比如伊尹非其義也非其道也一介不以與人一介不以取諸人繫馬干駟祿之以天下弗視弗顧與此所論一般聖人同處大槩皆在此於此而不同則不足以言聖人矣

伯豐問見其禮而知其政聞其樂而知其德是謂夫子
是謂他人曰只是大槩如此說子貢之意蓋言見人
之禮便可知其政聞人之樂便可知其德所以由百
世之後等百世之王莫有能違我之見者所以斷然
謂自生民以來未有孔子此子貢以其所見而知夫
子之聖如此也一說夫子見人之禮而知其政聞人
之樂而知其德由百世之後等百世之王莫有能逃
夫子之見者此子貢所以知其為生民以來未有也

然不如前說之順

以上語類三條

以力假仁章

問以力假仁以德行仁曰以力假仁仁與力是兩箇以德行仁仁便是德德便是仁問霸字之義曰霸即伯也漢書引哉生魄作哉生霸古者霸伯魄三字通用以德行仁者王所謂德者非止謂有救民於水火之誠心這德字又說得闊是自己身上事都做得是無一

不備了所以行出去便是仁

以上語類二條

仁則榮章

仁則榮不仁則辱此亦只是為下等人言若是上等人
他豈以榮辱之故而後行仁哉伊川易傳比彖辭有
云以聖人之心言之固至誠求天下之比以安民也
以後王之私言之不求下民之附則危亡至矣蓋且
得他畏危亡之禍而求所以比附其民猶勝於全不
顧者政此謂也

語類

尊賢使能章

市廛而不征問此市在何處曰此都邑之市人君國都

如井田樣畫為九區面朝背市左祖右社中間一區

則君之宮室宮室前一區為外朝凡朝會藏庫之屬

皆在馬後一區為市市四面有門每日市門開則商

賈百物皆入馬賦其廛者謂收其市地錢如今民間

之鋪面錢蓋逐末者多則賦其廛以抑之少則不廛

而但治以市官之法所以招徠之也市官之法如周

禮司市平物價治爭訟譏察異服異言之類市中惟

民乃得入凡公卿大夫有爵位及士者皆不得入

則有罰如國君過市則刑人赦夫人過市則罰一幕

世子過市則罰一幣命夫命婦過市則罰一蓋帷之

類左右各三區皆民所居而外朝一區左則宗廟右

則社稷在焉此國君都邑規模之大槩也

語類

問市廛而不征法而不廛曰此等制度皆不可詳大抵

邑居者必有廛稅市區亦應有之耳

答吳伯豐文集

問廛無夫里之布周禮宅不毛者有里布民無職事出

夫家之征鄭氏謂宅不種桑麻者罰之使出一里二十五家之布不知一里二十五家之布是如何曰亦不可考又問鄭氏謂民無常業者罰之使出一夫百畝之稅一家力役之征如何罰得恁地重曰後世之法與此正相反農民賦稅丁錢却重而游手浮浪之民泰然都不管他因說浙間農民丁錢之重民之彫困不可開眼

語類

人皆有不忍人之心章

人皆有不忍人之心者是得天地生物之心為心也蓋
無天地生物之心則沒這身才有這血氣之身便具
天地生物之心矣

天地以生物為心天包著地別無所作為只是生物而
已亘古亘今生生不窮人物則得此生物之心以為
心所以箇箇肖他本不須說以生物為心緣做箇語
句難做著箇以生物為心

問天地以生物為心而所生之物因各得夫天地之心

以為心所以人皆有不忍人之心曰天地生物自是
溫暖和煦這箇便是仁所以人物得之無不有慈愛
惻怛之心又曰人物皆得此理只緣他上面一箇母
子如此所以生物無不肖他

天地以生物為心譬如甑蒸飯氣從下面滾到上面又
滾下只管在裏面滾便蒸得熟天地只是包許多氣
在這裏無出處滾一番便生一番物他別無勾當只
是生物不似人便有許多應接所謂為心者豈是切

切然去做如云天命之豈諄諄然命之也但如磨子

相似只管磨出這物事人便是小胞天地是大胞人

首圓象天足方象地中間虛包許多生氣自是惻隱

不是為見人我一理後方有此惻隱而今便教單獨

只有一箇人也自有這惻隱若謂見人我一理而後

有之便是兩人相夾在這裏方有惻隱則是仁在外

非由內也且如乍見孺子入井時有惻隱若見他人

入井時也須自有惻隱在

池錄作若未見孺子入井亦自是惻隱

問怵

惕莫是動處因怵惕而後惻隱否曰不知孟子怎生
尋得這四箇字恁地好

問如何是發之人心而不可已曰見孺子將入井惻隱
之心便發出來如何已得此樣說話孟子說得極分
明世間事若出於人力安排底便已得若已不得便
是自然底

方其乍見孺子入井時也著脚手不得縱有許多私意
要譽鄉黨之類也未暇思量到但更遲霎時則了不

得也是非辭遜羞惡雖是與惻隱並說但此三者皆自惻隱中發出來因有惻隱後方有此三者惻隱比三者又較大得些子

如孺子入井如何不推得其他底出來只推得惻隱之心出來蓋理各有路如做得穿窬底事如何令人不羞惡偶遇一人衣冠而揖我我便亦揖他如何不恭敬事有是非必辨別其是非試看是甚麼去感得他何處一般出來

或問滿腔子是惻隱之心曰此身軀殼謂之腔子而今人滿身知痛處可見

問滿腔子是惻隱之心只是此心常存纔有一分私意便闕了他一分曰只是滿這箇軀殼都是惻隱之心纔觸著便是這箇物事出來大感則大應小感則小應恰似大段痛傷固是痛只如鍼子略挑些血出也便痛故日用所當應接更無些子間隔癢痲痲痛莫不相關纔是有些子不通便是被些私意隔了

問滿腔子是惻隱之心如何是滿腔子曰滿腔子是只
在這軀殼裏腔子乃洛中俗語又問惻隱之心固是
人心之懿因物感而發見處前輩令以此操而存之
充而達之不知如何要常存得此心曰此心因物方
感得出來如何強要尋討出此心常存在這裏只是
因感時識得此體平時敬以存之久久會熟善端發
處益見得分曉則存養之功益有所施矣

王丈說孟子惻隱之心一段論心不論性曰心性只是

一箇物事離不得孟子說四端處最好看惻隱是情
惻隱之心是仁仁是性三者相因橫渠云心統性情
此說極好

四端未是盡所以只謂之端然四端八箇字每字是一
意惻是惻然有此念起隱是惻然之後隱痛比惻是
深羞者羞己之非惡者惡人之惡辭者辭己之物讓
者讓與他人是非自是兩樣分明但仁是總名若說
仁義便如陰陽若說四端便如四時若分四端八字

便如八節

問喜怒哀樂未發已發之別曰未發時無形影可見但
於已發時照見謂如見孺子入井而有怵惕惻隱之
心便照見得有仁在裏面見穿窬之類而有羞惡之
心便照見得有義在裏面蓋這惻隱之心屬仁必有
這仁在裏面故發出來做惻隱之心羞惡之心屬義
必有這義在裏面故發出來做羞惡之心譬如目屬
肝耳屬腎若視不明聽不聰必是肝腎有病若視之

明聽之聰必是肝腎之氣無虧方能如此然而仁未
有惻隱之心只是箇愛底心義未有羞惡之心只是
箇斷制底心惟是先有這物事在裏面但隨所感觸
便自是發出來故見孺子入井便有惻隱之心見穿
窬之類便有羞惡之心見尊長之屬便有恭敬之心
見得是便有是之之心見得非便有非之之心從那
縫罅裏迸將出來恰似寶塔裏面四面豪光放出來
又云孟子此一章其初只是匹自閒容易說出來然

說得來連那本末內外體用精粗都包在裏面無些
欠闕處如孔子許多門弟都不曾恁地說得分曉想
是曾子子思後來講來講去講得精所以孟子說得
來恁地若子思亦只說得箇大體分曉而已

問前面專說不忍之心後面兼說四端亦是仁包四者
否曰然

惻隱是箇腦子羞惡辭遜是非須從這裏發來若非惻
隱三者俱是死物了惻隱之心通貫此三者

問四端之根於心覺得一者纔動三者亦自次第而見

曰這四箇界限自分明然亦有隨事相連而見者如
事親孝是愛之理才孝便能敬兄便是義問有節文
便是禮知其所以然便是智曰然問據看來多是相
連而至者如惻隱於所傷便惡於其所以傷這是仁
帶義意思惡於其所以傷便須惜其本來之未嘗傷
這是義帶仁意思曰也是如此嘗思之孟子發明四
端乃孔子所未發人只道孟子有闢楊墨之功殊不知

知他就人心上發明大功如此看來此說那時若行
楊墨亦不攻而自退闕楊墨是扞邊境之功發明四
端是安社稷之功若常體認得來所謂活潑潑地真
箇是活潑潑地

伊川嘗說如今人說力行是淺近事惟知為上知最為
要緊中庸說知仁勇把知做樞初頭說可見知是要
緊賀孫問孟子四端何為以知為後曰孟子只循環
說智本來是藏仁義禮惟是知恁地了方恁地是仁

禮義都藏在智裏面如元亨利貞貞是智貞却藏元
亨利意思在裏面如春夏秋冬冬是智冬却藏春生
夏長秋成意思在裏面且如冬伏藏都似不見到一
陽初動這生意方從中出也未發露十二月也未盡
發露只管養在這裏到春方發生到夏一齊都長秋
漸成漸藏冬依舊都收藏了只是大明終始亦見得
無終安得有始所以易言先王以至日閉關商旅不
行后不省方

至問凡有四端於我者知皆擴而充之矣莫是知得了方能擴而充之否曰知皆擴而充之即是苟能知去擴充則此道漸漸生長如火之始然泉之始達中間矣字文意不斷充是滿其本然之量却就有擴字則是方知去推廣要充滿他所以如火之始然泉之始達

始達
劉居之問人皆有不忍人之心一節曰惻隱之心仁之端也乍見孺子入井此只是一件事仁之端只是仁

萌芽處如羞惡辭遜是非方是義禮智之萌芽處要推廣充滿得自家本然之量不特是孺子入井便恁地其他事皆恁地如羞惡辭遜是非不特於一件事上恁地要事事皆然方是充滿慊足無少欠闕也知皆擴而充之矣知方且是知得如此至說到苟能充之足以保四海即掉了擴字只說充字蓋知字與始然始達字相應充字與保四海相應才知得便自不能已若火始然便不可遏泉才達便涓涓流而不絕

凡有四端於我者知皆擴而充之只是要擴而充之而
今四端之發甚有不整齊處有惻隱處有合惻隱而
不惻隱處有羞惡處又有合羞惡而不羞惡處且如
齊宣不忍於一牛而却不愛百姓噉爾之食則知惡
而弗受至於萬鐘之祿則不辨禮義而受之而今則
要就這處理會

人於仁義禮智惻隱羞惡辭遜是非此四者須當日夕
體究令分曉精確此四者皆我所固有其初發時毫

毛如也及推廣將去充滿其量則廣大無窮故孟子曰知皆擴而充之且如人有當惻隱而不惻隱當羞而不羞當惡而不惡當辭而不辭當遜而不遜是其所非非其所是者皆是失其本心此處皆當體察必有所以然也只此便是日用間做工夫處

人只有箇仁義禮智四者是一身綱紐其他更無當於其發處體驗擴充將去惻隱羞惡是非辭遜日間時時發動特人自不能擴充耳又言四者時時發動特

有正不正耳如暴戾愚狠便是發錯了羞惡之心含
糊不分曉便是發錯了是非之心如一種不遜便是
發錯了辭遜之心日間一正一反無往而非四端之
發

子武問四端須著逐處擴充之曰固是纔常常如此推
廣少閒便自會密自會闊到得無閒斷少閒却是打
合作一片去

問推四端而行亦無欠闕曰無欠闕只恐交加了合惻

隱底不惻隱合羞惡底不羞惡是是非非交加了四端本是對著他後流出來恐不對窠白子問不對窠白子莫是為私意隔了曰也是私意也是不曉節又問恭敬却無當不當曰此人不當拜他自家也去拜他便不是

問人心陷溺之久四端蔽於利欲之私初用功亦未免間斷曰固是然義理之心纔勝則利欲之念便消且如惻隱之心勝則殘虐之意自消羞惡之心勝則貪

冒無耻之意自消恭敬之心勝則驕惰之意自消是非之心勝則含糊苟且頑冥昏謬之意自消

黃景申高老問仁兼四端意思理會不透曰謝上蔡見明道先生舉史文成誦明道謂其玩物喪志上蔡汗流浹背面發赤色明道云此便見得惻隱之心公且道上蔡聞得過失恁地慚惶自是羞惡之心如何却說道見得惻隱之心公試思久之先生曰惟是有惻隱之心方會動若無惻隱之心却不會動惟是先動

了方始有羞惡方始有恭敬方始有是非動處便是
惻隱若不會動却不成人若不從動處發出所謂羞
惡者非羞惡所謂恭敬者非恭敬所謂是非者非是
非天地生生之理這些動意未嘗止息看如何枯亡
亦未嘗盡消滅自是有時而動學者只怕間斷了

以上

語類二
十六條

矢人豈不仁於函人章

問仁天之尊爵先生解曰仁者天地生物之心得之最

先如何是得之最先曰人得那生底道理所謂心生道也有是心斯具是形以生也

語類

子路人告之以有過則喜章

問是與人為善當其取人之際莫未有助之之意否曰然曰三者本意似只是取人但有淺深而與人為善乃是孟子再疊一意以發明之否曰然

語類

伯夷非其君不事章

至問集注云進不隱賢不枉道也似少字曰進不隱賢

便是必以其道人有所見不肯盡發出尚有所藏便是枉道至云尋常看此二句只云進雖不敢自隱其賢凡有所蘊皆樂於發用然而却不妄進二句做兩意看曰恁地看也得

不屑去說文說屑字云動作切切也只是不汲汲於就

不汲汲於去屑字却是重

必大錄云不以就為重而切切急於就不以去為重

而切切
急於去

問伯夷臨柳下惠不恭莫是後來之弊至此否曰伯夷

自是有隘處柳下惠自是有不恭處且如雖袒裼裸
裎於我側分明是不將人做人看了

或問明道云此非瑕疵夷惠之語言其弊必至於此今
觀伯夷與惡人處如以朝衣朝冠坐於塗炭則伯夷
果似隘者柳下惠雖袒裼裸裎於我側爾焉能浼我
哉柳下惠果似不恭者豈得謂其弊必至於此哉曰
伯夷既清必有隘處柳下惠既和必有不恭處道理
自是如此孟子恐後人以隘為清以不恭為和故曰

隘與不恭君子不由也

以上語類四條

溫公疑孟曰孟子稱所願學者孔子然則君子之行孰先於孔子孔子歷聘七十餘國皆以道不合而去豈非非其君不事與孺悲欲見孔子孔子辭以疾豈非非其友不友乎陽貨為政於魯孔子不肯仕豈非不立於惡人之朝乎為定哀之臣豈非不羞污君乎為委吏為乘田豈非不卑小官乎舉世莫知之不怨天不尤人豈非遺佚而不怨乎飲水曲肱樂在其中豈

非阨窮而不憫乎居鄉黨恂恂似不能言豈非由由
然與之偕而不自失乎是故君子邦有道則見邦無
道則隱事其大夫之賢者友其士之仁者非隘也和
而不同遯世無悶非不恭也苟毋失其中雖孔子由
之何得云君子不由乎隱之辨曰孟子曰伯夷隘柳
下惠不恭隘與不恭君子不由原孟子之言非是瑕
疵夷惠也而清和之弊必至於此蓋以一於清其流
必至於隘一於和其流必至於不恭其弊如是君子

宣由之乎苟得其中雖聖人亦由之矣觀吾孔子之
行時乎清而清時乎和而和仕止久速當其可而已
是乃所謂時中也是聖人之時者也詎可與夷惠同
日而語哉或謂伯夷制行以清下惠制行以和救時
之弊不得不然亦非知夷惠者苟有心於制行則清
也和也豈得至於聖哉夷之清惠之和蓋出於天性
之自然特立獨行而不變遂臻其極致此其所以為
聖之清聖之和也孟子固嘗以百世之師許之矣慮

後之學者慕其清和而失之偏於是立言深救清和之弊大有功於名教疑之者誤矣曰觀吾夫子之行時乎清而清時乎和而和仕止久速當其可而已是乃所謂時中也是聖人之時者也詎可與夷惠同日而語哉五十八字愚欲刪去而補之曰然此不待別求左驗而是非乃明也姑即溫公之所援以為說者論之固已曉然矣如溫公之說豈非吾夫子一人之身而兼二子之長與然則時乎清而非一於清矣是

以清而不隘時乎和而非一於和矣是以和而未嘗
不恭其曰聖之時者如四時之運溫涼和暖各以其
序非若伯夷之清則一於寒涼柳下惠之和則一於
溫暖而不能相通也以是言之則是溫公之所援以
為說者乃所以助孟子而非攻也又曰苟有心於制
行至章末愚欲刪去而易之曰使夷惠有心於制行
則方且勉強脩為之不暇尚何以為聖人之清和也
與彼其清且和也蓋得於不思不勉之自然是以特

立獨行終其身而不變此孟子所以直以為聖人而有同於孔子也又恐後之學者慕其清和而失之一偏於是立言以救其末流之弊而又曰乃所願則學孔子也其抑揚開示至深切矣亦何疑之有

讀余隱之尊孟

辨○文集

公孫丑下

天時不如地利章

孤虛以方位言如俗言向某方利某方不利之類王相

指日時

語類

孟子將朝王章

問孟子將朝王齊王托疾召孟子孟子亦辭以疾莫是
以齊王不合托疾否曰未論齊王托疾看孟子意只
說他不合來召蓋在他國時諸侯無越境之禮只因
以幣來聘故賢者受其幣而往見之所謂答禮行義
是也如見梁惠王也是惠王先來聘之既至其國或
為賓師有事則王自來見或自往見王但召之則不

可召之則有自尊之意故不往見也荅陳代如不待其招而往何哉此以在他國而言荅萬章天子不召師而况諸侯乎此以在其國而言

夫豈不義而曾子言之文勢似使管子而愚人也則可

若是義理不是則曾子豈肯恁地說

以上語類二條

溫公疑孟曰孔子聖人也定哀庸君也然定哀召孔子孔子不俟駕而行過位色勃如也足躡如也過虛位且不敢不恭况召之有不往而他適乎孟子學孔子

者也其道豈異乎夫君臣之義人之大倫也孟子之德孰與周公其齒之長孰與周公之於成王成王幼周公負之以朝諸侯及長而歸政北面稽首畏事之與事文武無異也豈得云彼有爵我有德齒可慢彼哉孟子謂蚍蜉處其位不可以不言言而不用不可以不去已無官守無言責進退可以有餘裕孟子居齊齊王師之夫師者導人以善而救其惡者也豈謂之無官守無言責乎若謂之為貧而仕耶則後車數

十乘從者數百人仰食於齊非抱關擊柝比也詩云
彼君子兮不素餐兮夫賢者所為百世之法也余懼
後之人挾其有以驕其君無所事而貪祿位者皆援
孟子以自況故不得不疑隱之辨曰孟子將朝王王
使人來曰寡人如就見者也有寒疾不可以風朝將
視朝不識可使寡人得見乎探王之意未嘗知以尊
德樂道為事方且恃萬乘之尊不肯先賢者之屈故
辭以疾欲使孟子屈身先之也孟子知其意亦辭以

疾者非驕之也身可屈道其可屈乎其與君命名不
俟駕而行異矣又孟子曰天下有達尊三朝廷莫如
爵鄉黨莫如齒輔世長民莫如德夫尊有德敬耆老
乃自古人君通行之道也人君所貴者爵爾豈可慢
夫齒與德哉若夫伊尹之於太甲周公之於成王此
乃大臣輔導幼主非可與達尊槩而論也又孟子謂
蚍蜉為士師職所當諫諫之不行則當去為臣之道
當如是也為王之師則異矣記曰君之所不臣於其

臣者二而師處其一尊師之禮詔於天子無北面非所謂有官守有言責者也其進退豈不綽綽然有餘裕哉孟子以道自任一言一行未嘗少戾於道意謂人君尊德樂道不如是則不足與有為而謂挾其有以驕其君無所事而貪祿位者過矣曰愚謂孟子固將朝王矣而王以疾要之則孟子辭而不往其意若曰自我而朝王則貴貴也貴貴義也而何不可之有以王召我則非尊賢之禮矣如是而往於義何所當

哉若其所以與孔子異者則孟子自言之詳矣恐溫
公亦未深考耳孟子達尊之義愚謂達者通也三者
不相值則各伸其尊而無所屈一或相值則通視其
重之所在而致隆焉故朝廷之上以伊尹周公之忠
聖耆老而祇奉嗣王左右孺子不敢以其齒德加焉
至論輔世長民之任則太甲成王固拜手稽首於伊
尹周公之前矣其迭為屈伸以致崇極之義不異於
孟子之言也故曰通視其重之所在而致隆焉唯可

與權者知之矣官守言責一職之守耳其進退去就
決於一事之得失一言之從違者也若為師則異於
是矣然亦豈不問其道之行否而食其祿耶觀孟子
卒致為臣而歸齊王以萬鍾留之而不可得則可見

其出處大槩矣

讀余隱之尊
孟辯○文集

孟子之平陸章

王之為都左傳邑有先君之廟曰都看得來古之王者

嘗為都處便自有廟

賀孫錄云古
人之廟不遷

如太王廟在岐文

王廟在豐武王祭太王則於岐祭文王則於豐

賀孫云鎬

京却無二王之廟

王朝步自周至於豐是自鎬至豐以告文

王廟也又如晉獻公使申生祭於曲沃武公雖自曲沃入晉而其先君之廟則仍在曲沃而不徙也又曰王之為都又恐是周禮所謂都鄙之都周禮四縣為

都

語類

沈同以其私問章

孟子荅沈同伐燕一章誠為未盡何以異於是之下合

更說是弔民伐罪不行殘虐之主方可以伐之如此
乃善又孟子居齊許久伐燕之事必親見之齊王乃
無一語謀於孟子而孟子亦無一語諫之何也想得
孟子亦必以伐之為是但不意齊師之暴虐耳不然
齊有一大事如此而齊王不相謀孟子豈可更居齊
耶史記云鄒人孟軻勸齊伐燕云此湯武之舉也想
承此誤然亦有不可曉者

勸齊伐燕如何曰孟子言伐燕處有四須合而觀之燕

之父子君臣如此固有可伐之理然孟子不曾教齊不伐亦不曾教齊必伐但曰為天吏則可以伐之又

曰若殺其父兄係累其子弟則非孟子意也

以上語類二條

鄭公藝圃折衷曰孟子謂沈同曰子噲不得與入燕子之不得受燕於子噲有仕於此而子悅之不告於王而私與之吾子之祿爵夫士也亦無王命而私受之於子則可乎大夫爵祿制於諸侯是誠古之道也孟軻既教齊梁滕之君使自為湯武則是諸侯未嘗受

命於天子也沈同不敢以爵祿私人齊制之也子
噲不敢以燕私人將復誰制之哉何孟軻獨能約
燕以王制而不能約齊梁滕於古道也隱之辯曰孟
子告沈同曰子噲不得與人燕子之不得受燕於子
噲有仕於此而子悅之不告於王而私與之吾子之
祿爵夫士也亦無王命而私受之於子則可乎者是
約燕於王制也其意曷嘗不存周哉勸齊梁滕之為
湯武者正欲其行仁義而知有王制云爾豈可謂夏

商在上而湯武不得行仁義與湯武行仁義無一言及之唯罪湯武之征伐掩善揚惡豈得為公論亦可謂處變事而不知其權者也勸其君行仁義以為不道者余知之矣彼非以仁義為不美也但急於近功謂仁義為迂闊不切時務不若進富國強兵之術也若其誠然商鞅之徒為之孟子不為也曰諸侯受國於天子故子噲之讓為無王天子受命於天故文王受命作周不受於紂而無罪辯謂鄭氏以仁義為迂

關則未然第恐若商鞅之談帝道爾

讀余隱之尊
五辯○文集

燕人畔章

安卿問周公誅管蔡自公義言之其心固正大直截自
私恩言之其情終有不自滿處所以孟子謂周公之
過不亦宜乎曰是但他豈得已哉莫到恁地較好看
周公當初做這一事也大段踈脫他也看那兄弟不
過本是怕武庚叛故遣管蔡霍叔去監他為其至親
可恃不知他反去與武庚同作一黨

語類

孟子去齊章

陳希真問孟子去齊處集注引李氏說憂則違之而荷
蕢所以為果如何曰孟子與荷蕢皆是憂則違之但
荷蕢果於去不若孟子遲遲吾行蓋得時行道者聖
人之本心不遇而去者聖人之不得已此與孔子去
魯之心同蓋聖賢憂世濟時之心誠非若荷蕢之果

於去也

語類

滕文公上

滕文公為世子章

孟子道性善言必稱堯舜須看因何理會箇性善作甚
底

性善故人皆可以為堯舜必稱堯舜所以驗性善之實
孔子罕言性孟子見滕文公便道性善必稱堯舜恰似
孟子告人躡等相似然他亦欲人先知得一箇本原
則為善必力去惡必勇今於義理須是見得了自然
循理有不得不然若說我要做好事所謂這些意能

得幾時子

劉棟問人未能便至堯舜而孟子言必稱之何也曰道性善與稱堯舜二句正相表裏蓋人之所以不至於堯舜者是他力量不至固無可奈何然人須當以堯舜為法如射者之於的箭箭皆欲其中其不中者其技藝未精也人到得堯舜地位方做得一箇人無所欠闕然也只是本分事這便是止於至善

孟子初見滕世子想是見其資質好遂即其本原一切

為他啟迪了世子若是負荷得時便只是如此了及
其復見孟子孟子見其領略未得更不說了只是發
他志但得於此勉之亦可以至彼若更說便漏遠了
當時啟迪之言想見甚好惜其不全記不得一觀

符舜功問滕世子從孟子言何故後來不濟事曰亦是
信不篤如自楚反復問孟子孟子已知之曰世子疑
吾言乎則是知性不的他當時地步狹本難做又識
見卑未嘗立定得志且如許行之術至淺下且延之

舉此可見

以上語
類六條

孟子見人即道性善稱堯舜此是第一義若於此看得透信得及直下便是聖賢更無一毫人欲之私做得病痛若信不及孟子又說箇第二節工夫又只引成覿顏淵公明儀三段說話教人如此發憤勇猛向前日用之間不得存留一毫人欲之私在這裏此外更無別法若於此有箇奮迅興起處方有田地可下工夫不然即是畫脂鏤冰無真實得力處也

○答梁文叔文集

滕定公薨章

今欲處世事於陵夷之後乃一向討論典故亦果何益
孟子於滕文公乃云諸侯之禮吾未之學便說與齊
疏之服飢粥之食哭泣盡哀大綱先正了

古宗法如周公兄弟之為諸侯者則皆以魯國為宗至
戰國時滕猶稱魯為宗國也

以上語
類二條

滕文公問為國章

因說今日田賦利害曰某嘗疑孟子所謂夏后氏五十

而貢殷人七十而助周人百畝而徹恐不解如此先
王疆理天下之初做許多畝溝澮之類大段費人
力了若自五十而增為七十自七十而增為百畝則
田間許多疆理都合更改恐無是理孟子當時未必
親見只是傳聞如此恐亦難盡信也

語類

問周人百畝而徹集注云一夫受田百畝鄉遂用貢法
十夫有溝都鄙用助法八家同井耕則通力而作收
則計畝而分必大謂井田與溝澮之制不同而近時

永嘉諸公及余正父皆謂鄉遂都鄙初無二制不知
何以考之也曰此亦不可詳知但因洛陽議論中通
徹而耕之說推之耳或但耕則通力而耕收則各得
其畝亦未可知也鄉遂都鄙田制不同周禮分明如
近年新說只教畫在紙上亦畫不成如何行得且若
如此則有田之家一處受田一處應役彼此交互難
相統一官司既難稽考民間易生弊病公私煩擾不
可勝言聖人立法必不如此也

答吳伯豐

實皆什一之說記得亦用廬舍拆除公田二十畝如先

儒之舊但此却只說得百畝而徹耳七十而助之法則須就公田七十畝中剋除廬舍而實計則亦可揆成什一注中必是不曾說此一節此間無本檢不得然此亦大槩依約不見古法果如何且當取其大指之略通可也如來諭商人以七畝為助此語亦疎蓋貢助異法貢則直計其五畝之人自賦於官助法則須計公田之中八家各助七畝只得五十六畝其十

四畝須依古法折除一家各得一畝若干步為廬舍
方成八家各助耕公田七畝也如謂某說商人九分
取一周人十分取一恐亦非某本文商人九分取一
除廬井則為十分取一如前所云固自分明周人則
鄉遂溝洫用貢法而自賦自不妨十分取一唯都鄙
井田用助法則為九一然如前說去其廬井則亦不
害為十之一矣周人未嘗專用九一也

答林一之○
以上文集二

條

世祿是食公田之人問鄰長比長之屬有祿否曰恐未
必有問士者之學如何曰亦農隙而學孰與教之曰
鄉他錄
作帥大夫有德行而致其仕者俾教之

孟子只把雨我公田證周亦有公田讀書亦不須究盡

細微

因論永嘉之學於
制度名物上致詳

請野九一而助國中什一使自賦如古注之說如何曰
若將周禮一一求合其說亦難此二句大率有周禮
制度野謂甸稍縣都行九一法國中什一以在王城

豐凶易察

國中行鄉遂之法如五家為比五比為閭四閭為族五族為黨五黨為州又如五人為伍五伍為兩四兩為卒五卒為旅五旅為師五師為軍皆是五五相連屬所以行不得那九一之法故只得什一使自賦如鄉遂

鄉遂應作都鄙

却行井牧之法

此處應有鄉遂之法四字

次第是一家出

一人兵且如五家為比比便有一箇長了井牧之法次第是三十家方出得士十人徒十人井田之法孟

子說夏五十而貢殷七十而助周百畝而徹此都是
孟子拗處先是五十後是七十又是一百便是一番
打碎一番想聖人處事必不如是勞擾

問圭田餘夫之田是在公田私田之外否曰卿受田六
十邑乃當二百四十井此外又有圭田五十畝也餘
夫二十五畝乃是十六歲以前所受在一夫百畝之
外也孟子亦是言大槩耳未必曾見周禮也

以上語
類五條

有為神農之言章

問決汝漢排淮泗曰其說只是一時行文之過別無奧義不足深論況淮泗能壅汝水不能壅漢水今排淮泗而汝水終不入江則排淮泗而後汝漢得以入江之說有不通矣沈存中引李翱南來錄言唐時淮南漕渠猶是流水而汝漢泗水皆從此以入江但今江淮漸深故不通耳此或猶可強說然運河自是夫差所通之邗溝初非禹迹且若如此則淮又不能專達於海亦不得在四瀆之數矣沈說終亦不能通也

吳荅

伯豐○

文集

問振德是施惠之意否曰是然不是財惠之惠只是施之以教化上文匡直輔翼等事是也彼既自得之復

從而教之

語類

墨者夷之章

亞夫問愛無羞等施由親始與親親而仁民仁民而愛物相類否曰既是愛無羞等何故又施由親始這便是有差等又如施由親始一句乃是夷之臨時謨出

來揍孟子意却不知愛無差等一句已不是了他所
謂施由親始便是把愛無差等之心施之然把愛人
之心推來愛親是甚道理

問人只是一父母所生如木只是一根株夷子却視他
人之親猶己之親如牽彼樹根強合此樹根曰愛無
差等便是二本至曰命之矣之字作夷子名看方成
句法若作虛字看則不成句法曰是

以上語類二條

問愛無差等施由親始夷子既知此說便當一親疎合

貴賤方得今却曰施由親始則是又將親疎對待而言豈非吾之愛又有差等哉其詞氣牴牾信乎遁而窮矣曰夷之所說愛無差等此是大病其言施由親始雖若粗有差別然亦是施此無差等之愛耳故孟子但責其二本而不論其下句之自相矛盾也夷之所以卒能感動而自知其非蓋因孟子極言非為人泚之心有以切中其病耳此是緊要處當著眼目也

答張敬之

○文集

滕文公下

陳代曰不見諸侯章

問枉尺直尋曰援天下以道若枉已便已枉道則是已
失援天下之具矣更說甚事自家身既已壞了如何

直人

語類

景春曰公孫衍張儀章

敬之問居天下之廣居立天下之正位行天下之大道
曰大槩只是無些子偏曲且如此心廓然無一毫私

意直與天地同量這便是居天下之廣居便是居仁到得自家立身更無些子不當於理這便是立天下之正位便是守禮及推而見於事更無些子不合於義這便是行天下之大道便是由義論上兩句則居廣居是體立正位是用論下兩句則立正位是體行大道是用要知能居天下之廣居自然能立天下之正位行天下之大道

類語

宋小國章

問滕文公之問逾迫而孟子所以答之者若無可為謀者極其規模所就亦不過太王畏天保國之事至於萬章之問宋而孟子遽以成湯樂天之事反覆告之豈滕之地褊小不足以有為而王偃滅滕伐薛敗諸侯之兵果有可畏之實耶曰強弱者勢也得失者事也宋滕之強弱有異故其得失之效不同但共一事之如此而為得如此而為失則其理未嘗不同耳若曰以強弱為得失則是強者常得弱者常失也豈其

然乎

○答敬之文集

公孫丑問不見諸侯章

至云看得孟子於辭受取舍進退去就莫非天理時中之妙無一毫人欲之私無一毫過不及之病如謂段干木踰垣而避之泄柳閉門而不納是皆已甚迫斯可以見矣充仲子之操則蚓而後可謂非其有而取之者盜也充類至義之盡辭曰聞戒餽贖可受則受之皆無一毫過不及無一毫私意曰道理固是恁地

而今有此事到面前這道理又却那裏安頓

語類

公都子問好辯章

居之問孟子豈好辯章先生令看大意曰此段最好看
看見諸聖賢遭時之變各行其道是這般時節其所
以救正之者是這般樣子這見得聖賢是甚麼樣大
力量恰似天地有闕處得聖賢出來補得教周全
補得周全後過得稍久又不免有闕又得聖賢出來
補這見聖賢是甚力量直有闔闢乾坤之功

問孔子作春秋空言無補亂臣賊子何緣便懼且何足
為春秋之一治曰非說當時便一治只是存得箇治
法使這道理光明燦爛有能舉而行之為治不難當
時史書掌於史官想人不得見及孔子取而筆削之
而其義大明孔子亦何嘗有意說用某字使人知勸
用某字使人知懼用某字有甚微詞與義使人曉不
得足以褒貶榮辱人來不過如今之史書直書其事
善者惡者了然在目觀之者知所懲勸故亂臣賊子

有所畏懼而不犯耳

問孟子好辯一節曰當時如縱橫刑名之徒孟子却不
管他蓋他只壞得箇粗底若楊墨則害了人心須著
與之辯時舉謂當時人心不正趨向不一非孟子力
起而闢之則聖人之道無自而明是時真箇少孟子
不得曰孟子於當時只在私下恁地說所謂楊墨之
徒也未怕他到後世却因其言而知聖人之道為是
知異端之學為非乃是孟子有功於後世耳

因居之看好辯一章曰墨氏愛無差等故視其父如路
人楊氏只理會自己所謂修其身而外天下國家者
故至於無君要之楊墨即是逆理不循理耳如一株
木順生向上去是順理今一枝乃逆下生來是逆理
也如水本潤下今洪水乃橫流是逆理也禹掘地而
注之海乃順水之性使之潤下而已暴君壞宮室以
為汙池棄田以為園圃民有屋可居有地可種桑麻
今乃壞而棄之是逆理也湯武之舉乃是順理如楊

墨逆理無父無君邪說誣民仁義充塞便至於率獸
食人人相食此孟子極力闢之亦只是順理而已

敬之間楊墨曰楊墨只是差了些子其末流遂至於無
父無君蓋楊氏見世間人營營於名利埋沒其身而
不自知故獨潔其身以自高如荷蕢接輿之徒是也
然使人皆如此潔身而自為則天下事教誰理會此
便是無君也墨氏見世間人自私自利不能及人故
欲兼天下之人而盡愛之然不知或有一患難在君

親則當先救之在他人則當後救之若君親與他人不分先後則是待君親猶他人也便是無父此二者之所以為禽獸也孟子之辯只緣是救過不得今人見佛老家之說者或以為其說似勝吾儒之說或又以為彼雖說得不是不用管他此皆是看他不破故不能與之辯若真箇見得是害人心亂吾道豈容不與之辯所謂孟子好辯者非好辯也自是住不得也孟子言我欲正人心蓋人心正然後可以有所為今人

心都不正了如何可以理會

以上語類六條

出邪則入正出正則入邪兩者之間蓋不容髮也雖未知道而能言距楊墨者已是心術向正之人所以

聖人之徒許之與春秋討賊之意同

荅石子重

孟子荅公都子好辯一章三復之餘廢書太息只為見得天理忒煞分明便自然如此住不得若見不到此又如何強得也然聖賢奉行天討却自有箇不易之理故曰能言距楊墨者聖人之徒也此便與春秋討

亂臣賊子之意一般舊來讀過亦不覺近乃識之耳

與張敬夫

鄭公藝圃折衷曰秦始皇漢武帝唐太宗欲無夷狄韓
愈欲無釋老孟子欲無楊墨甚哉未之思也天不唯
慶雲瑞雲景風時雨而霜雹降焉地不唯五穀桑麻
而萑稗鉤吻生焉山林河海不唯龜龍麟鳳而鴟梟
豺狼蛟鼉出焉古今豈有無小人之國哉作易者其
知道乎隱之辯曰秦始皇漢武帝唐太宗欲無夷狄

是皆好大喜功窮兵黷武之過孟子欲無楊墨韓子
欲無釋老豈愛摩頂放踵利天下為之一則為義之
偏其過至於無君一則為仁之偏其過至於無父先
王大道由是榛塞孟子辭而闢之然後廓如也釋氏
生西竺漢明帝始求事之老氏生周末西漢竇后始
好尚之自晉梁以及於唐其教顯行韓公力排斥之
然後大道得不泯絕有識之士謂洪水之害害於人
身邪說之害害於人心身之害為易見尚可避者心

之害為難知溺其說者形存而生亡矣自非智識高明孰知其害而務去之乎韓公謂孟子距楊墨而其功不在禹下唐之史臣謂韓公排釋老而其功與孟子齊而力倍之詎不信夫且夫唐虞三代之盛時未嘗有所謂釋老楊墨者苟欲其無亦不為過而謂地不唯五穀桑麻而蕘稗鉤吻生焉世豈有種五穀桑麻而不去蕘稗鉤吻者與若孟子者正務去蕘稗鉤吻之害而欲五穀桑麻之有成也今乃立異論以攻

之是誠何心哉予懼聖道之不明故不得不與之辯
曰知堯舜孔孟所傳之正然後知異端之為害也深
而息邪距詖之功大矣彼曰景風時雨與戾氣旱蝗
均出於天五穀桑麻與萁稗鈎吻均出於地此固然
矣人生其間混然中處盡其燮理之功則有景風時
雨而無戾氣旱蝗有五穀桑麻而無萁稗鈎吻此人
所以參天地贊化育而天地所以待人而為三才也
孟子之闢異端如宣王之攘夷狄其志亦若此而已

豈秦始皇漢武帝之比哉聖人作易以立人極其義以君子為主故為君子謀而不為小人謀觀泰否剝復名卦之意則可見矣而曰古今豈有無小人之國哉嗚呼作易者其知道乎其不知易者甚哉

讀余隱之尊孟

辯○以上文集三條

陳仲子豈不誠廉士章

溫公疑孟曰仲子以兄之祿為不義之祿蓋謂不以其道事君而得之也以兄之室為不義之室蓋謂不以

其道取於人而成之也仲子蓋嘗諫其兄矣而兄不用也仲子之志以為吾既知其不義矣然且食而居之是口非之而身享之也故避之居於於陵於陵之室與粟身織屨妻辟纊而得之也非不義也豈當更問其築與種者誰與以所食之鵠兄所受之饋也故哇之豈以母則不食以妻則食之耶君子之責人當探其情仲子之避兄離母豈所願耶若仲子者誠非中行亦狷者有所不為也孟子過之何其甚耶隱之

辯曰陳仲子弗居不義之室弗食不義之祿夫孰得而非之居於於陵以彰兄之過與妻同處而離其母人則不為也而謂仲子避兄離母豈所願耶殊不知其說仲子之兄非不友孰使之避仲子之母非不慈孰使之離烏得謂之豈所願耶仲子齊之世家萬鍾之祿世之有矣不知何為諫其兄以其祿與室為不義而弗食弗居也謂仲子為狷者有所不為避兄離母可謂狷乎孟子深闢之者以離母則不孝避兄則

不恭也使仲子之道行則天下之人不知義之所在
謂兄可避母可離其害教也大矣孟子之言履霜之
戒也與曰溫公云仲子嘗諫其兄而兄不用然且食
而居之是口非之而身享之也故避之又曰仲子獨
者有所不為者也愚謂口非之而身享之一時之小
嫌獨者之不為一身之小節至於父子兄弟乃人之
大倫天地之大義一日去之則禽獸夷狄矣雖復謹
小嫌守小節亦將安所施哉此孟子絕仲子之本意

隱之云仲子之兄非不友孰使之避仲子之母非不
慈孰使之離愚謂政使不慈不友亦無逃去之理觀
舜之為法於天下者則知之矣

讀余隱之尊
孟辭○文集

御纂朱子全書卷二十



總校官庶吉士臣張能照

校對官編修臣裴謙

膳錄監生臣劉昫